

Në bazë të nenit 35, paragrafit 1, nënparagrafit 1.1 të Ligjit nr.03/L-209 mbi Bankën Qendrore të Republikës së Kosovës (Gazeta Zyrtare e Republikës së Kosovës, nr.77 / 16 gusht 2010) dhe nenit 85 të Ligjit nr.04/L-093 mbi Bankat, Institucionet Mikrofinanciare dhe Institucionet Financiare Jobankare (Gazeta Zyrtare e Republikës së Kosovës, nr.11 / 11 maj 2012), Bordi i Bankës Qendrore të Republikës së Kosovës në mbledhjen e mbajtur me 22 dhjetor 2015, miratoi si vijon:

RREGULLORE PËR SHPËRNDARJEN E MJETEVE TË KREDISË PËR BANKAT

Neni 1 Qëllimi dhe fushëveprimi

1. Kjo rregullore ka për qëllim rregullimin e praktikës së shpërndarjes së mjeteve të kredisë tek huamarrësit.
2. Kjo rregullore aplikohet për të gjitha bankat dhe degët e bankave të huaja të licencuara nga BQK-ja për të operuar në Republikën e Kosovës (në vijim të referuara si: *banka*).

Neni 2 Përkufizimet

1. Të gjitha përkufizimet e përdorura në këtë rregullore kanë kuptim të njëjtë me përkufizimet e përcaktuara në nenin 3 të Ligjit nr.04/L-093 për Banka, Institucione Mikrofinanciare dhe Institucione Financiare Jobankare (në vijim: Ligji për Bankat) dhe / ose me përkufizimet në vijim për qëllim të kësaj rregulloreje:
 - a) *Mjete të kredisë* - nënkupton parat e gatshme të shpërndara për kreditë, mbitërheqjet, linjat kreditore, si dhe ekspozimet e tjera kreditore që lidhen me shpërndarjen e parave të gatshme.

Neni 3 Kërkesat

1. Mjetet e kredisë në shumën mbi 10,000 euro (dhjetë mijë euro), fillimisht duhet të shpërndahen në llogarinë e kredimarrësit.
2. Tërheqja e mjeteve të kredisë në para të gatshme është e lejuar deri në shumën prej 10,000 euro (dhjetëmijë euro) të gjithsej shumës së aprovuar të kredisë.
3. Mjetet e kredisë në shumën mbi 10,000 euro (dhjetëmijë euro) nga llogaria e kredimarrësit duhet të shpërndahen vetëm përmes transfereve bankare të mbështetura me dokumente valide si:

- a) Fatura (Profatura mund të shfrytëzohet si dokument valid deri në momentin e realizimit të transaksionit), apo vërtetimi për parapagim i lëshuar nga institucioni kredidhënës, në rastet e parapagimit të kredive; ose
- b) Kontrata e shitblerjes e vërtetuar nga organet kompetente (noteri apo gjykata).
4. Në rastet specifike kur shfrytëzimi i mjeteve të kredisë nuk mund të mbështetet me dokumentacionin e përcaktuar me paragrafin 3 të këtij neni, mjetet e kredisë në shumën mbi 10,000 euro (dhjetëmijë euro) duhet të transferohen në llogarinë bankare të kredimarrësit dhe pastaj mund të shfrytëzohen nga kredimarrësi për pagesë ndaj furnitorëve të tjerë apo të tërhiqen në para të gatshme nga kredimarrësi, përderisa shfrytëzimi i tyre të jetë i dokumentuar nga kredimarrësi për bankën.
5. Bankat për të qenë në pajtueshmëri me paragrafët e këtij neni nuk duhet të strukturojnë transaksionet në mënyrë që t'i shmangen kërkesave të paragrafëve të këtij neni.
6. Për shkak të specifikave të produktit kreditor të mbitërheqjes, shpërndarja e mjeteve të mbitërheqjes në formë të parave të gatshme në pajtim me paragrafët 1, 2 dhe 3 të këtij neni duhet të bëhet vetëm me rastin e shfrytëzimit të shumës së aprovuar të mbitërheqjes, më pas banka duhet të monitorojë shpërndarjen e parave të gatshme në pajtueshmëri me qëllimin e shfrytëzimit.
7. Banka për të qenë në pajtueshmëri me paragrafët e këtij neni, duhet të sigurojnë një sistem të kontrollit të brendshëm, i cili do të sigurojë shpërndarjen e mjeteve të kredisë sipas kërkesave të kësaj rregullore.

Neni 4

Zbatimi, masat përmirësuese dhe dënimet civile

Çdo shkelje e dispozitave të kësaj rregulloreje do të jetë subjekt i masave përmirësuese dhe dënimeve civile, siç përcaktohet në Ligjin për Bankën Qendrore dhe Ligjin për Bankat.

Neni 5

Shfuqizimet

Me hyrjen në fuqi të kësaj rregulloreje, shfuqizohet Rregulla e BQK-së XXIX mbi Pagesën Direkte dhe Indirekte të Kredive në Para të Gatshme, e miratuar nga Bordi i BQK-së më 31 tetor 2007 dhe çdo dispozitë tjetër që është në kundërshtim me kërkesat e kësaj rregulloreje.

Neni 6

Hyrja në Fuqi

Kjo rregullore hyn në fuqi më 01 janar 2016.

Kryetari i Bordit të Bankës Qendrore të Republikës së Kosovës

Prof. Dr. Bedri Peci